

KONTROL MOZIOA

HIRIKO IRISGARRITASUN BALIABIDEEN MANTENIMENDUARI BURUZKOA,

Garbiñe Alkiza Lopez de Samaniego EH BILDU udal taldeko zinegotziak, Udaltzaren Organo Araudiko 98. artikulua oinarri, mozio hau aurkezten du, Udaltzaren azter dadin. Mozioa 2020ko otsailaren 17an Gune Publikoen Batzordean aurkeztutako interpelazioaren ondorioa da.

JUSTIFIKAZIOA

Agintaldia hasi dugunetik, ugari izan dira igogailu eta arrapala mekanikoak ez dabiltzala azaldu dituzten bizilagunen kexak.

Bi kontu salatu dituzte, gehienbat, kaltetutako bizilagunek hilabete hauetan. Alde batetik, kasu batzuetan luze iraun duela matxurak konpondu diren arte, horrek bizilagunen eguneroko ibilbideetan oztupoak eta ezinegona ekarriz. Eta bestetik, Udalaren partetik jaso duten informazio eta komunikazio gabezia.

Horren adibide garbienak Aieteko funikularra eta Larratxoko igogailuak izan dira. Aieteko funikularrari dagokionez, 2019ko abenduan Aieteko bizilagunek publikoki egin zuten salaketa. Lehenik, martxan jarri denetik maiz zerbitzuz kanpo aurkitu dutela adierazi zuten, eta bigarrenik Udalak ez dituela kaltetutako bizilagunak behar bezala informatu. Proposamen bat ere helarazi zuten publikoki Aieteko bizilagun hauek; kartela igogailuan bertan jarri beharrean, Morlans kale hasieran jar zezatela, igogailuraino alferrikako ibilbidea ez egitearren.

Urte honen hasieran arazoak eman zituen bigarren igogailua Larratxokoa izan da. Igogailu honek urtarrilean hogeit hamar egun baino gehiago pasatu ditu matxuratuta, bizilagunen haserrea sortzeraino. Hemen Aieteko funikularraren kontu bera errepikatu baitzen: matxura egun luzez iraun zuela eta bizilagunek ez zutela behar bezalako informaziorik jaso.

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

Hala ere, hauek ez dira agintaldia hasi dugunetik arazoak eman dituzten baliabide bakarrak. Alde batetik, Bidebietako Juan Carlos Guerra eta Azkuene kaleak lotzen dituen igogailua maiz matxuratuta egoten dela adierazi digute bizilagunek. Eta bestetik, Larratxoko eskailera mekanikoak eta Intxaurrendoko arrapala mekanikoak askotan geldirik egoten dira erabiltzaileen kalterako.

Matxura hauek guztiak arazoak ekartzen ditu auzo horietako bizilagunen eguneroko irisgarritasunean eta mugikortasunean. Batez ere, igogailuen kasuan, baliabide horiek erabiltzera doazenean, ez dutelako matxuraren berri igogailuaren ateraino iritsi arte. Bertan, kartel bat aurkitzen dute maiz, baina beste batzuetan hori ere ez. Bestelako aukerarik izan gabe.

Arazo honi buruz galdetu genuen Gune Publikoen Batzordearen otsaileko bileran, eta horretarako Hiri Mantentze Zerbitzuko zuzendariaren eta arloko zinegotzi arduradunaren azalpenak jaso genituen.

Azalpen horien bidez mantentze-lanez arduratzen diren kontratazioen berri izan genuen, eta igogailu eta arrapaletan azken aldian gertatu diren matxuren berri ere bai.

Kontrataturako enpresen erantzun-gaitasunari buruzko azalpenak eta hobekuntzen beharra aipatu ziren batzorde hartan, eta jada arazo hori aztertzeko unea dela iruditzen zaigu, matxuren arrazoiak bata ala bestea izan. Udal Gobernuak, hala ere, ez du arazo honi heltzeko konpromiso garbirik agertu eta kezkatuago agertu da, nolabait, bere jarduna edo jardun falta justifikatzeaz.

Matxurez bizilagunei emandako informazioari eta Udalak erabiltzen dituen komunikazio-bideei buruz galdetuta, horiek hobetzekoak zirela onartu zuten bai zuzendariak bai zinegotziak, baina zehaztasunik eman gabe.

Aipaturako auzoetako bizilagun askok ezinbesteko baliabide dituzte igogailu eta arrapala mekanikoak beren eguneroko mugikortasunean, eta haien funtzionamendua egokia dela bermatu behar du Udal Gobernu honek.

Horiek horrela, honako hau da behean sinatzen duen zinegotziak aurkeztutako **KONTROL MOZIOA**:

1.- Udalbatzak hertsatuki eskatzen dio Udal Gobernuari igogailu eta arrapala mekanikoen mantentze-zerbitzua berrazter dezala, zerbitzuaren kontratazio-baldintzak barne, eta sistema eraginkor bat ezar dezala baliabide hauen funtzionamendua bermatzeko.

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

2.- Udalbatzak hertsatuki eskatzen dio Udal Gobernuari igogailu eta arrapala mekanikoen aurrean bizilagunak informatzeko komunikazio-bide berriak azter ditzala (besteak beste, inguruko portaletan kartelak jartzea -edo, Aieteren kasuan, Morlans kalearen hasieran jakinarazpena-, wifi bidezko panelak edo, datu-base bat erabiliz, SMS mezuak).

Donostian, 2020ko otsailaren 21ean

Garbiñe Alkiza Lopez de Samaniego
EH BILDU udal taldeko zinegotzia